

**Kalaallit Nunaanni eqqartuussisarnermik inatsisip allangortinneqarnissaanut inatsisissatut siunnersuutip (Pinerlunnernut Immikkut Isigisarialinnut Nuna tamakkerlugu Immikkoortortap Kalaallit Nunaannut piginnaatitaanera il. il.) kiisalu pillaasarnermik inatsisip, eqqartuussisarnermik inatsisip, aningaasanik malunnaarunnaarsaasarneq pillugu inatsisip aamma inatsisit allat assigiinngitsut pillugit inatsisip allangortinneqarnerata ilaanik Kalaallit Nunaannut atuutilersitsinissamat peqqussutissatut missingiut pillugit Kalaallit Nunaanni Namminersorlutik Oqartussanit akuersissutigineqarnissaa pillug Inatsisartut aalajangiiffigisassaattut siunnersuut (Aatsitassanut Inatsisillu Atuutsinneqarnerannut Naalakkersuisoq)**

### **Saqqummiussissut**

(Aatsitassanut Inatsisillu Atuutsinneqarnerannut Naalakkersuisoq)

### **Siullermeerneqarnera**

Nunami maani ilaatigut aningaasaqarnikkut pinerluuteqarnerit immikkut ittumik assigiinngitsunik katitigaasut pillugit suliat pillugit Kalaallit Nunaanni Politiit paasinarsitsinissamat eqqartuussivikkullu suliasanngortitsinissamat periarfissaasa patajaallisaavigineqarnissaat siunertaralugu inatsisissatut siunnersuut manna saqqummiunneqarpoq.

Inatsisit atuutsinneqarnerannut suliasaqarfiup nutarsarneqarnissaa pillugu, taamaalilluni sunniuteqarluartuuniassammat aamma ullumikkumut naleqquttuuniassammat, qallunaat naalakkersuisuunik suleqatigiinnerup maannakkut ingerlasup taamaalilluni inatsisissatut siunnersuut aammattaq ilagaa.

Politiit unnerluussisussaataitaasullu aningaasaqarnerat pillugu 2021-imiit 2023 ilanngullugu ukiunut arlalinnut qallunaat naalakkersuisuisa isumaqatigiissuteqarnerannut atatillugu Pinerlunnernut Immikkut Isigisarialinnut Nuna tamakkerlugu Immikkoortortaq Danmarkimi pilersinneqarpoq 2022-imilu 1. januar aallarnerfigalugu atulerluni.

Inatsisinik unioqqutitsinerup immikkut ittumik annertussuseqarnera imaluunniit nunani allani oqartussanik suleqatiginninnissaq pillugu pissutissalimmik isumaqartoqartillugu, suliat isumalluutitik atuiffiunerpaat aamma assigiinngitsunik katitigaanerpaat ilaat Immikkut ittumik pinerluuteqarneq pillugu Nuna tamakkerlugu Immikkoortortaqarfiup misissoqqissaartarpai pillaatissiissutigineqarnissaallu suliarisarlugu.

Pisoq taanna ilutigalugu aammattaq aningaasatigut peqquserluutitik malunnaarunnaarsaanerup aamma peqqarniisaarniarnernut aningaasalersuinerup aamma pinerluuteqarnermut suliasaqarfiit allat pillugit akiuniarnermi ajornaatsumik sulinissamat suleqatigiinneq pilersinneqarpoq.

Kalaallit Nunaanni suliani assigiinngitsunik katitigaasuni taamaattuni Kalaallit Nunaanni Politiit misissueqqissaarneranni Pinerlunnernut Immikkut Isigisarialinnut Immikkoortortaqarfiup ikiunissamik piginnaatitaanera, siunnersuutip matuma kinguneraa.

Pinerluutinut assigiinngitsunik katitigaasunut misissuinernut eqqartuussivinnullu suliassanngortitsinernut naleqqiullugu, Kalaallit Nunaanni inuiaqatigiit Danmarkimisut sullinneqarnissaat taamatut iliornikkut qulakkeerpeqarpoq.

Naalakkersuisut taamatut oqaaseqarlutik immikkoortup Inatsisartuni suliarineqarnissaanut tunniukkumavaat.